

四

明

叢書

張宗祥



00
2
10

陳忠貞公遺集卷三

縣後學張壽鏞詠霓輯

文

戊辰選貢祭祖文

維崇禎元年歲次戊辰九月戊午朔越十九日丙子曾
孫天工祭告明山始祖暨昭穆歷祖曰茲因天工叨荷
覃恩得中選貢龍飛啓蟻伏之門鶚薦開鵬搏之路崇
禎籲俊兆起風雲盛世思皇慶餘水木鍾明山之靈秀
遠武宋室名臣聯科甲之絲綸近接明朝翰苑敬潔桂

醕用伸虔告

壬午歸里祭祖文

維崇禎十五年歲次壬午十一月丁卯朔越二十七日
癸巳曾孫良謨祭奠明山十五世祖忠肅公暨昭穆歷
祖曰鬱蔥佳氣水木本源明山鍾異宋代衣冠傳世十
五遭逢明聖戊辰恩選祥發其端庚午辛未聯飛三捷
投牒萬里南詔盤桓戊寅召對欽授御史請改今名宗
序始安持斧西蜀時艱孔亟輦藩卻寇瀝膽披肝己卯
叱馭四載靡鹽壬午秋孟疏復金鑾錦江瀾靜仰慰西

顧得代歸里祖澤瀾灑潔牲庶品式展孝思蒼蒼松柏
啓佑鍾蕃尙饗

題太白山人張庚星小影

閩南著書五千言潮陽吟詩八百首生平嗜書兼嗜酒
書不停披杯在手出則傳巖之梅羹處則商山之橘叟
平安家信

弟良謨頓首二月廿後連有廿五六兩號家書付孫九
如并宗海管家任瑞順寄數日前因眞定有亂兵之變
傳是流賊破了京城戒嚴隨後知是兵叛人心始定只

是外解杳然兵餉無措屢傳諭旨向文武百官借助一
次解都察院一百兩今又於浙江省七千數內派認二
百兩急在燃眉尙無措處今差大老往各省勸借浙直
等處乃原任大司馬張玉老也凡在外見任在籍縉紳
俱要借助其數目以多爲上其名色亦不一或免罪或
復官或納官納封其能多助至一萬二萬者或晉爵或
晉階或以子弟爲官恩典甚厚在京見任各官俱已捐
助過了捐助數少不在勸借之內要各舉堪借富紳無
有舉者故爾差官勸借我一次助過六十二次助過一

百今三次又要二百稱貸無門病中心如火焚身如卧
飯以此舊病又不時舉發君父如此焦勞時事如此孔
棘臺班何官乃卧病竊祿何以自安見在告病求歸幸
總憲先因奉旨選差河南巡按不論新舊疏內已說我
患病情真不堪選差三月初五具呈求代奏已批發掌
道今只候代奏奉旨便可出京只是人頭債多尙無盤
費僅得給假回籍又作區處以我病勢遇今時勢度已
量力不但不願做官雖欲做官實實的做不來了惟歸
家杜門服藥尙可保殘喘侍老母菽水我原無宦囊無

產業此番在京負債甚多目下苦狀比星符在京時又大不同了只是手下人少欠人用柰何京師安靜如故恐訛言亂傳慎勿輕信歸路水陸未定看都察院代奏消息如何又寄信不盡三月初六日弟謨再頓首外久思字一封寄星符書一封天保寄書二封

遺囑

殉難之官不應口言家事但我年五十六尙無子承繼事以家庭之理論自屬嫡姪久樞但久樞係長兄長子別無餘弟不能專爲我後毛家外甥係胞妹之子第三

甥小官向有成說劉星符第二子武官係妻兄弟之子
亦曾議及恨我去年赴京時不早定此計今遺命並立
三兒兄弟稱呼炤年齒我一生清白無宦囊薄田不多
凡在納糧簿內者除賣造父母墳塋并留祀田外餘俱
三分均分內久樞一分不論執杖不執杖並與之老母
年高惟靠兄姪奉侍他非所及崇禎十七年三月十九
日手書遺囑

題絕命詞後

爲臣爲子不能兩全慷慨從容同歸一死大明四川道

監察御史陳良謨書於賊陷北京之日

絕筆

食君之祿國亡與亡良謨抱病日久生旣不能手刃李
賊死當爲厲鬼以殺之三月十九日絕筆

陳忠貞公遺集卷三

陳忠貞公遺集卷四

縣後學張壽鏞詠霓輯

附錄上

諭祭

明諭祭文 弘光元年

皇帝遣官諭祭殉難四川道監察御史陳良謨之靈曰
昊天鞠誼廟社遺憫龍髯鼎駕箕尾晨星惟爾粹白宅
心艱貞鍊骨惠敷滇李帝鑒揆留勞護蜀桐王綸游錫
追趨閭闔誓一死以殉君屹砥河山捐七尺而報國遙

辭烏鳥之養淚灑萱闈頓息熊羆之占血凝簋室興言
憫悼用示優崇爾靈有知尙克歆承

清諭祭文

順治十一年六月

皇帝遣官諭祭故明御史今賜諡恭潔陳良謨之靈曰
致身報主者人臣之大節褒忠揚烈者盛世之隆恩事
雖異乎兩朝勸尤彰於一代爾故明御史陳良謨賦姿
英偉醞德貞方宿秉丹心勁氣重蘭臺之望久標清譽
亮懷著聽馬之名迨寇陷都城投繯莫惜文章偕氣節
並垂學術與綱常同重爰賜祭壇載頒嘉諡嗚呼芳流

彤管光增日月之輝
碧化黃壚氣壯河山之色
爾靈有知尙克歆饗

畫像

陳忠貞公畫像



陳恭潔公像贊

有序

沈祖懋

公諱良謨字士亮浙江鄞縣人崇禎四年辛未科陳于
泰榜第三甲第十七名進士原名天工思宗以爲褻天
改之初任雲南大理府推官考最擢四川道御史巡按
川中以楊嗣昌委過蜀撫乃並奪公職嗣昌敗命公留
蜀任兩年代還補原官甲申殉國難詳見全謝山先生
所作傳中公嘗夢拜文信國於堂下信國揖之上曰公
與予一揆何拜爲將殉難曰主不冕服臣敢具冠帶顧
安所得潔巾而服之邑人李芳泰以巾進公藍便服著

巾入室自縊妾時氏從死年只十八南朝贈公太僕卿
謚恭愍魯王監國加右副都御史謚忠貞國朝賜謚恭
潔同治甲子獲瞻遺像乃爲之贊

贊曰賢如平原爲進明欺公之醇厚迺信督師忠肝義
膽化及淑姬雙湖不湮鑒此鬚眉

陳恭潔公像贊

有序

張恕

公自按蜀代還寫照於家世藏娑羅園旣園改爲祠塑
像其中遺照無及見者曩歲恕與盧孝廉杰王大令瀛
修葺公祠於敗楮中得公遺像敬加裝襯歸其族孫石

介先生每歲首懸奉家廟先生恐展轉遺佚令仲君烈
洁別摹一像而藏其原像於家屬恕識於上方并系以
贊

贊曰節義炯垂綱常永繫千尺貞松凜然霜氣文介忠
肅光輝炳麟公迪前人仰此丹青

題重摹陳恭潔公像

童槐

槐少時過娑羅園拜公祠下嘗瞻仰塑像心敬誌之近
復得觀石刻像於旌忠廟迺與塑像少異然皆神完貌
粹懍懍乎千尺貞松孤映寒潭之上俯仰閒霜氣逼人

也此帙蓋不能彷彿萬一矣雙湖張氏曰公像自在人心揣而得之誠不求形似云時丁亥秋九月童槐謹書於古紅蓮閣

謁陳恭潔公像

王堃

武陵獎疏漫深論日月光懸正氣存子職未供難兩盡

天潢且絕尙何言

臨終時作兩手書一上太夫人一以與承祧子

從容筆墨酬

賓幕

李芳泰

慷慨衣冠拜帝闈從識瀕行留畫影已拌一

死報君恩

冢墓

故明殉難忠臣賓日陳公暨贈孺人時氏墓誌銘

高斗樞

嘗觀崇禎甲申三月之變蓋古今所僅覲哉天子英武親握太阿當中外訐瀆時宵旰憂勞銳意救寧而盈廷積狃無堪禦侮甚者韎韋諸君子衷實選懦而貌乃陸梁司馬之律久不行於棄甲之弁而賈販登壇輒委簡書於草莽賊自成一小豎子耳稔亂多年游窺天邑倉皇失措龍御上賓豈不痛哉當時殉難僅三十餘人然求其生能戮力不分負國之愆而死則慷慨決烈可觀